

QUÆSTIO MEDICA.

QUODLIBETARIIS DISPUTATIONIBUS
manè discutienda in Scholis Medicorum
die Jovis 15. Januarii.

M. ANTONIO DE CAEN, Doctore
Medico, Præsides.

Suntne tam varia Morborum, quàm agrorum facies?

I.

HOMO, homini quid intersit, non omnes tenent. Alterum ab altero ex facie internoscere cuivis vel bardo promptum est: assequi etiam, quod ad communem omnium naturam pertinet, potest vel mediocriter eruditus: Uniuscujusque verò propriam introspicere, pervidere, omnique ex parte exploratam habere, ne quidem factus ad unguem Medicus. Ferè nimirum Vulpeculæ similes, lambimus vitreum vas, pul-tem haud attingimus. Expediat aliquis, ex quo, seden-ribus in concilio cordatis viris, tanta sit de re unâ opi-nionum disjunctio; Unde tam varii palati convivæ pos-cant tam diversa; Quamobrem aliqui carnes, pisces alii, nonnulli vinum tantoperè oderint; Contrâ hujus dul-cedine capti plurimi haud aliud vitæ præmium intelli-gant; Cur ille ad casei, hic ad leporis, is ad rosæ con-spectum cohorrescat & contrahatur. Quâ de causâ iste est adeò projectus in Venerem, in quam hic oris floriduli,

florentisque ætatis, ac corporis, omnino friget? Quâ vi, dum sonum reddit pulsata Cithara, illi uni locum invito exprimit?

I I.

TOT varietatum, effectuumque dissidentium causa eadem quæ sanitatis, & morborum; partium videlicet consimilium temperies, organicarum conformatio, omniumque positus, & consociatio singularis. At enim, velut è paucis numero litteris variè inter se compositis, ingens nascitur vocabulorum multitudo; ita è paucioribus partibus tam discrepantes, quàm infinitæ, hominum facies effinguntur: quin è paucissimis elementorum qualitibus tot exurgunt temperationum, quot hominum formæ, illarum effectrices rerum, quas admirari aliquantò facilius sit, quàm enodare. Nec aliunde profectò est, quòd nunc mas, nunc fœmina prodit in vitæ scenam: quòd stabilis constansque est unius valetudo, alterius prorsus vitrea æquè, splendens ac fragilis; quòd in aliquibus nihil in victu delinquentibus, angustioris vitæ flosculus decurrit quàm celerrimè; aliis diutius in eâ manentibus; propter ipsam quoque rem, venientes ac recedentes anni multa secum ferunt comoda & incommoda.

I I I.

PAR ratio invaletudinum tribus summis temperiei, conformationis, continuationisve partium violatæ generibus contentarum; à quibus, nisi qui ad curandum accedit, descendat per subiectos gradus ad infima, sua ipsi ars inanis futura est, quamvis ad manum sint omnia, quibus morbus *æτ' εἶδος* debet oppugnari, præsidia. Plane ut unus ille sanos homines perspectos habet, cui, quid commune sit omnibus, quid proprium singu-

lis, penitùs notum est : itâ is tantùm eximiè medentis personam sustinet, qui communem ac totam morbi cuiusque notionem, insupérque singularia illa, quæ in nulum alium convenire possunt, gerit in animo consignata; cui, non modò inchoata, sed præstans ac difficilis similitudinum etiam peritis imponentium, atque dissimilitudinum intelligentia res compertas efficit. Vis illud in apertum lucem vocatum ante oculos tibi statuerè ?

I V.

L A T E fufum febris nomen (ut inde specimen capiatur) fit licet ad eam quæ quartâ quâque luce torret, contractum; adhuc vana est imago morbi, cujus mille discrimina : quapropter cave de illius moribus, exitu, & curatione quidquam ante proferas, quam liqueat, sit domesticus, necne; quâ parte anni; quo domestico more degentem corripuerit; tenuis, an firmæ valetudinis hominem, puerum, juvenem, annosumve senem; ocio disluentem, an curis, aut labore confectum exerceat; quo sub cælo natus, eductusque sit; quale solum calcet; quem ore ducat aërem; quibus se pascat cibis. Neque hîc consistendum: ipsa quippe, quæ febrem circunculant mala, ejus quoque produnt ingenium; scire ut permagni referat, paucarum sit, an multarum horarum, sub eâne integra sint, an corrupta, aut effœta viscera; num vomitus, tussisque ægrum quatiant; fusior sit, subsistatne alvus; adsint sitis, sudor, vigiliæ; an contra veternus occupet. Quæ quidem omnia, ut in hominum genus universum cadere queant, nullo non variantur in corpore.

V.

Q U A M dispar itaque sanorum hominum constitutio, temperies, natura, & indoles; tam dispares ægrotorum, morborumque formæ ac species: simili modo,

quàm multiplex ac diversa latentium intus humorum conditio, tàm dissimilis inde exortarum ægrotationum ratio. Hinc tantus labor, tótque exorbendæ difficultates ritè medendi scientiam professo: ut, nisi hæc singula venetur, & intento animo cernat, agitet, atque ad invicem compareret, suum cuique malo remedium aptaturus, Medici titulum temerè sibi arroget: in ultimas verò terras exportandi sint eorum omnium rudes isti homunciones, veriùs fungi, qui naturæ quoque totius ignaros homines, sæpiùs magnas inter opes à rectâ mente inopes perniciosè ludificant, unico adversùs quasilibet ægritudines nunquam non usi pharmaco.

Ergo tam varia morborum, quàm ægrorum facies.

Domini Doctores disputaturi.

M. Claudius Berger.
M. Claudius Biendisant.

M. Henricus Mahieu.
M. Claudius Guirin.

M. Alanus Lamy.
M. Claudius Quartier, Censor
Academiæ.
M. Antonius Bourgaud.

M. Dominicus de Farcy.

M. Paulus Mattot.

Proponerebat Parisiis FRANCISCUS MAILLARD,
Parisiinus, Baccalaureus Medicus. A. R. S. H. 1682.

Apud Franciscum Muguet, Regis & Facultatis Medicinæ
Typographum.